

1 PITA

Pitana pepa pase wambo piyamo doko Anatunya rombo palyisi wambu bolombalo lao pao yuu Esia Maina dulurena peteyami dupwana lao pyao maiya. Angi renge suu pyao piyamo doko Kurisene wambu dupwa Yesu kapa ingingi lao suu pingi dokona randa andake nao piyaminyi peteyamisa dokona yaka lao sepala poraiyuo kararami lao pepa dake pyao maiya. Dopa pyuo pyao maiyuo dokopa yaka larami dupwa Yesu kumuya lopo epeya dee eparo lao kana minyuo leya doko angi pyaka sera lao suu pyao karena lao pyao maiya. Renge dokona lao nakama randa eparamo dupwana mee apu ingyuo kaso kararami. Doko nakama Yesu angi kapa ingingi lao suu pyalu pyao pilyaminyi dokona makande pyuo kandarasa pira. Enakana Yesu epo malaramo dokopa yano pyakara ingyiyamo lao mona kumapala karalapape, lao piya.

Randa epara dupwana porainyi pyambuo lapala mende pii dokona kamba palyuo laowako Koraisana wambu piso karo pingi kata dokona pisipwape, lao poraiyuo leya.

Pitana pepa pase dakena akali Elyambu Pinginya kyawa dupwape mee Kurisene wambupi koo nono ingyuo inyimungu kararami dokona pyasi palamo.

Buku Dakena Pii Palamo Dusipa

1. Pii kanda soo piya 1:1-2
2. Anatumi nakama lete wai pyao nyiya dokona lao piya 1:3-12

3. Koraisana wambu piso karo pingi kata rolae doko 1:13–2:10
4. Randa eparamo dokopa Kurisene wambunya yulu doko 2:11–4:19
5. Kurisene wambu inyimungu karo yulu keyange pingi 5:1-11
6. Pii lao oto leya 5:12-14

¹ Namba Pita Yesu Koraisana aposele akali pepa pase dake nakama Anatunya wambu yapasi ralo papala yuu Pondasape Galasiape Kapatosiape Esiape Bitiniape petaminyi dupwa keta pyao jilyu. ² Rakane Anatumi suu piyamuli pyuo rombo palyiyamopa banya Imambu Poo Pyasi dokome nakama poo pyao nyiya. Yesu Koraisana ranjama kulimbua isa peyamo dokome nakama wate pisi karaminyi dokona banya pii dupwa warombo soo pisipwape.

Anatunya mona keyange palyuo ipingi regepe mona kyuu lao singi regepe baa nakama keta jokondali pipiyali yaka lao leto.

Mende Piralyamo Lao Soo Manjisi Karamano

³ Kamongo Yesu Koraisana Rakange Anatu kando sangyu lao lakando karamana. Baa mona keyange palyapala ipyuo karengi dokome Yesu Koraisa lete minyalyuo nyiyasa namwame kyakana rege nyepala lete parama dokona enenge ingyuo manjo nyisi karamano. ⁴ Dokona lao Anatumi banya wambu dupwana lao rege keyange reto karamo dokona sepala mona kare kare karamano. Baame namwana keyange dupwa yake panda serakalyamo dupwa momo naope momonda raope mende pii nange.

⁵ Lumwa pingi yuu gii pyaka seramopa Anatu namwa lete wai pyao nyero lao reteyamo doko kandalana iso karaminyi. Baa kapa ingingi lao suu pilyaminyi dokona baa banya porai renge dokome nakama kyawa minyaro karamo.

⁶ Makande pingi yulu wakale wakale ipyasa dakepale randa napala mona nembo karaminyipape Anatu kyawa minyaro karamo doko suu pyapala rae maiyuo angingyuo karalapape.

⁷ Randa epelyamo dupwame nakama Kurisene angingyuo karamipi lao makande pilyamo. Kana golo poraipi mee lao kandalana isareme kiso kandenge kandale doko suu pyao makande pingi wakale eparamopa nakama porayapala Anatu kapa ingingi lao suu pyao manjo kararami ramo suu pingi keyange doko golo doko mee kuki inginyi pyambwara. Dopa pyuo kararami ramo Yesu Koraisa pano eparamo mange dokopa nakama neta renge ingyuo kingi londapala ketae pyambusi kararami.

⁸ Nakama Anatu kanda nayaminyipape mona reto karaminyi. Baa dakepa nee pipyamopa karamo donjo baa kapa ingingi lao suu pilyaminyi. Nakama dopa pyuo karo monarena rae maingi dokome palyuo pyokondepa pyaramopa dokona kambunya piimi kapa lapa narami.

⁹ Nakama Anatu kapa ingingi lao suu pyao karaminyi dokome jingi lyilyamo doko nakamana imambu lete wai pyao nyera doko yole ingili lao nyeramisira pira. ¹⁰ Poropeta akali dupwame Anatu yuu mendepa namwana imambu lete wai pyao nyera renge doko wangu lakao karo kareyami. ¹¹⁻¹² Nakama yulu keyange doko

yuu gii doko anjokorapena epo, apa pyuo pyaka sera lao dokona koto kareyami. Anjala nakama opetaeme kandamwalinya suu pyaoko kareyami. Doko Koraisana Imambu nakama keta maralyapala Koraisa baa apa pyuo yaso napala yanga paupau lenge neta renge nyera doko wambo nolakao lamaiya. Nakama wambo nolakao lao kareyami pii doko Imambu Poo Pyasi yake panda rae dokome epapu waili pii keyange lao epelyaminyi dupwa nyisapyamopa langimi. Nakama range dokona reke lao leyaminde daa.

Yulu Rolae Pyuo Karalapape

¹³ Suu pinginya luu pali napala isaro karalapape. Yesu Koraisa pano eparamopa renge keyange nakama keta paliramo dupwa suu pyale pyale pupwape. ¹⁴ Nakama wambo kamenge karo yulu wambarae pyuo kareyami dupwa moko minyuo paa napala Anatu dokona suu pyao warombo soo karalapape. ¹⁵ Yulu wambarae dupwa kaeyapala Anatu nakama sukusa ipupwape leyamo doko baa poo pyasi ingyuo karenge dokona suu pyao nakamana yulu dupwa poo pyasi ingyuo sinya lao pyuo karalapape. ¹⁶ Buku Baepolena lao dokopa, Namba poo pyasi karo dokona lao nakama poo pyasi karalapa letamo.

¹⁷ Nakama atenja lao dokopa Anatu kando namwana Rakane lao lenge ramo doko baame rolae pyuo wambu yulu pinginyili pyuo pakana palyuo kote lenge dokona isa panda dakena kararaminyi mange dusipa peparapae yuu gii peparape baapa lao pako karalapape.

¹⁸ Nakamana kauwanemoome kata angi daanja

lasaka piyaminypa papyuo kareyami dokona aki mende nakama kiiramo nyiya lao doko suu pyalapape. Mee isa pandana kana golo kulingipi isa penge dokore daa. ¹⁹ Koraisa baa sipisipi ikyane usa mende nyisa pisa nange dopale ingyapala nakamana lao kumuo maiyamopa kiiramo epasi karaminyi. ²⁰ Yuu muu dupwa ene wasapa nayamopa Anatumi Yesu rombo palyiyamopa baa yuu gii repetale lumwa piramo mange dokopa nakamana lao epo paneya. ²¹ Baa epeyamo dokona Anatu kapa ingingi lao suu pilyminyi. Anatumi baa lete minyalyuo nyepala neta renge ingyuo karena leyamopa nakama Yesu keta Anatu kapa ingingi lao suu pyapala mona kare kare karaminyi.

²² Nakama pii kinyi doko moko minyuo papala yulu koo dupwa kaeyapala Anatunya Imambunya yulu rolae pilyaminyi dokona Kurisene yango dupwa mona angi reto karalapape. ²³ Nakama isa wambunya para pyao nyisi ingyuo paa nalyaminyi. Anatunya letena palenge pii sulu singi dokome nakama banya wane wanake karalu karengenge ingyuo manjo nyilyamo. ²⁴ Baepolena lao dokopa,

Wambu peparae makwa ingyuo kuku pyaraminde daa letamo.
Jingi bui renge dupwa yuu gii mendasipa iki au pipala loo lenge kandale.
Doko suu pyao wambu dupwa mee dokona mendeke ingyuo karaminyi pilyamo.

²⁵ Kamongona pii doko mee sulu sera letamo.
Doko waili pii keyange epapu nakama keta langyuo epelyaminyi doko lyakande.

2

Lete Palengena Kanape Yuu Rara Poo Pyasi-pana Pii Palamo

¹ Yulu koo kyambo lengepe pii lamana palyuo lengepe yango palyuo lengepe kilya kando lengepe dupwa rekya lao yaki nyelapape.

² Wane nyaname yangama alemanji lao anju ipwange nano pingi doko suu pyao nakama Imambunya nenge angi doko wangu lakao koto karalapape. Nao andapala lete parami ingilyamo.

³ Baepolena lao dokopa, Kamongome embapa elya kalo mondo lao karamo doko nakanjo sepala karaminyi letamo.

⁴ Lete palengena kana doko isa wambumi meenje lapala nembeyaminyipape Anatumi nyuo rombo palyapala mupwa wakasa lao suu pyao karamo. Kana angi doko repeta epo pisipwape. ⁵ Nakama opetae lete palengena kana pote isa ingyuo paraminyipa Anatumi Imambunya andaŋa lao nakama wasalana suu pilyamo.

Nakama purisinya rara poo pyasi dokona yulu pyuo kararami ingilyamo. Pyuo karo Anatu rae mairali dupwa Imambunya yulu dokona suu pyao Yesu Koraisa keta rendamu pyuo kiso maiyuo karalapape. ⁶ Buku Baepolena pii mende pyasi palamo doko,

Kana keyange mende yapo nyepala

yuu Sayone dokona mupwa ingyuo pisilyu letamo.

Mendeme kana dokona mona maira ramo doko baa kanjakala parami ingya nalyamo letamo.

⁷ Nakama mona kapu kyingi wambu dupwa kana doko ama keyange lao suu pyarami. Mona kapu kyaa nange dupwame, Kana doko kupyuo nembeyami doko enakana mupwa ingyuo siyamo kandeyami.

⁸ Baepolena pii mendasa lao dokopa, Wambu dupwa kana dokona pyalya minyapala lukumwarami.

Lukumapala angi isa parami lyakande.

Nakama Anatunya pii doko soo nyii nayamisa baa leyamuli pyuo lukumayami.

⁹ Nakama Anatunya wambu rara yapasi ingyapala rakange pongo poo pyasi ingyuo karaminyi. Iminjinginya peteyaminyipa Anatumi yangaenge dorena kee lao sukusa nyepala nakama Kinjinya purisi akali ingyini pyambuyamosa banya yulu andake dupwa pano larami lyakande. ¹⁰ Nakamba wambo wakale ingyuo peteyamiyipa epapu Anatunya wambu karaminyi. Anatunya sakao nyiso karengenge rengo dokona kamenge see nao kareyami doko epapu nakama kete palamo.

Anatunya Kendemande Wambu

¹¹ Nambana puu minyingimoo. Nakama isa panda dakena yanda paenge akali mee sisipanda epo karaminyi pilyamo. Dokona yongonya yulu koo dupwame imambunya suu pingi mare angi dokona isare mailyamoŋo ama wanjo karalapase lao langilyu. ¹² Kurisene daa pipa karo dokopa emba dopalepe dapale lao kandarami doko suu pyao kandokondali pyuo wasinyi nembo piso karo piri. Dokopa Yesu kapu kyo eparamo

gii dokopa nakamana yulu keyange dupwa p-naramopa kandarami Anatu kando lakandarami ingilyamo.

¹³⁻¹⁴ Kamongo dokona reke lao gapomane kando kui lao pispwape. Dopako pyuo gapomane akali mupwa doko warombo soo karalapape. Baa akali andake dokome lapo wambu rapu pyuo karena lao pena leyamopa nakama koo pingi wambu dupwa randa maiyuo, elyape pingi dupwa lakando pyuo pingi dokona nakama warombo soo karalapape. ¹⁵ Wambu kopyali dupwame nakama kando kyanje soo lao karengedupwa nakamana yulu keyange pirami dupwa kandapala dokopa mende larami ingya nalyamo yulu rolae dopale Anatumi nakama pimili lao suu pilyamo. ¹⁶ Nakama kiiramo pasi ingyuo karalapape. Lowa malu pali nalyamo lapala yulu koo lapo kapa piru lao suu pyaa nalapape. Dopa pii napala Anatunya kendemande wambu ingyuo karalapape. ¹⁷ Wambu peparae lakanda minya minya pyuo karalapape. Anatu kando pako Kurisene yango dupwa mona maiyuo karalapape. Gapomane akali mupwa doko ketae pyambuo karalapape.

Koraisa Baa Yaso Neyamo Dokona Suu Pyalapape

¹⁸ Yulu akali dupwame nakamana yulu pyakamaingi akali doko lakanda minya minya pyuo karalapape. Anjiki pingi dupwasa iki laa nalyo. Pyalana pyuo yulu jingi dupwa opetae kando lakanda minya minya pyuo karalapape. ¹⁹ Yulu rolae pirinyi randa jeraminyipa Anatunya

kingi reke lao kui lao pisiri ramo doko Anatumi renge keyange jera. ²⁰ Yulu koo pirinyipa pyarami dokopa mende laa nao kararami ramo doko mee kapa rolae ingyuo para. Doko mee kapa rolae ingyuo paramopape koo mende pii napala kopetame pyarami dokopa mende laa narami ramo doko Anatumi emba elyape keta pisara. ²¹ Anatumi yulu keyange dopale pirami lao nakama sukusa nyiya. Koraisa nakamana lao randa nyiyamo doko kandapala yaso neyamo pinjingi dokona narami ingilyamo. ²² Koraisa baame yulu koo mende pipala kyambo pii mende leyamo siyaminde daa. ²³ Baa kando kilya kando leyaminyipape baame isingi pii koo dopale laa naya. Piyami dokopa isingi pyalana pii nayako. Anatu baa kote pii rolae lenge dokona suu pyapala mona kare kare kareya. ²⁴ Namwa yulu koo dupwa yaki nyuo kaeyapala rolae pirami dokona lao Yesumi isa mamando dokona namwana koo dupwa paleta siya. Baa piyami dokome nakama pyuo nyisi karaminyi kande. ²⁵ Nakama wambo mena sipisipi isako dupwana ralo penge ingyuo kareyami. Dakepa Anatunya Imambunya yulu rapu pyuo karengi akali andake dokona repeta epapala moko minyuo pelyaminyi.

3

Etenge Akalingipana Pii Palamo

¹ Dopako pyuo nakama enda dupwa akalinya dokona isarena pispwape. Dopa pirami dokome baa Anatunya pii dokona sili see nale lao karengi ramo doko nakamana yulu rolae dupwa kyanyi kandapala mona kapu kyera. Nakamame piimi

lao sukusa nyeraminde daa. ² Mee nakama baa lakanda minya minya pyuo yulu yapasi ingyuo pyuo pisirami doko kando serami. ³ Nakama mee yongo ketae doko iki kalya pyuo komau keyange wapuo mola soo kyawasi kalya pyuo au pyuo paraminde daa. ⁴ Anatumi epe soo kanda dupwa mona andarena kalya pisi sinya lao elya kalo anjiki pyuo piso karo pipape. ⁵ Wamba dokopa Anatunya enda yapasi lapo baapa lao mona kare kare peteyami dupwame akalingi epe soo karenale lao nakamana pii warombo palyuo peteyami. ⁶ Enda Sera baa dopako pyuo Aporakamena pii warombo sepala baa, Nambana kamongo lao suu pyao peteya. Nakama dopale ingyuo yulu rolae pyuo pakange renge mende sukusa nyii nao pisirami ramo doko nakama enda Serana wanenge ingyuo pisiramisa pira.

⁷ Dee nakama akalingi dupwame etenge dupwa porai daa dokona kata mai nao nyuo arapunya palyuo rapu pyuo karalapape. Anatumi letena renge jeramo dokona nakamba opetae nakama pipya mendare ingyuo nyerami. Dopa pyuo pisirami ramo dokome nakamana atenja doko kapa ingyuo para.

*Yulu Rolaena Reke Lao Randa
Nyingi Doko*

⁸ Epapu lumwa pyuo leto. Doko nakama Kurisene yango dupwa kondo suu pingi mendakinya palyuo mona maiyuo yalya kando pispwape. Range mupwa lao suu pyaa napala anjiki pyuo pispwape. ⁹ Mendeme koo piya kande doko koo dokomeko isingi pyuope dee kilya kando

laramo doko isingi kilya kando laope pii nalapape. Nakama mee rae maiyuo pena lao piri. Anatumi namwa sukusa nyuo dokopa keyange keta pyakaro leya. ¹⁰ Dokona ingyuo Baepolena pii mende palamo doko,

Mendeme raeme kumuo mona seramo karalana suu pyara ramo doko baa kyambo piipi mata kando lengepe dupwa yaki nyuo kaeyapenge ingylyamo.

¹¹ Baa yulu koo dupwa mata maipala mona kyuu lao singinya kata koto nyepala wailyaro soo pirasa pira.

¹² Kamongome yulu rolae pingi dupwa kyanyi kandapala nakamana atenja dupwa epe soo petenge. Koo pingi dupwa kando epe nasepala mata maingi.

¹³ Yulu rolae dupwana wangu lakapala pinya pirami ramo doko api mendeme mojo jerase?

¹⁴ Yulu rolaena reke lao yaso narenepape rae maiyuoko kareneje. Wambu yango kando mona nembo paka nalapape. ¹⁵ Nakamana mona anda dokona Koraisa baa mupwa lao suu pyapala baa Kamongo dokona lao ketae pyambwala-pape. Mendeme nakamana keyange pira lao mona kare kare karaminyi renge dokona piso seraminyi kandena. Pisarami dokopa pii keyange polo lamairunju lapala wambo rapa rapa pyuo karalapape. ¹⁶ Polo lamaiyuo dokopa pyalana pii nao anjiki pyuo mana lamairi. Yulu koo mende pii nare dokome lapo nakama mata kando lao kararami ramo dupwa enakana embena Kurisene yulu keyange kandapala kandakinyuo lapulyamo

lao suu pyapala elyuo parami. ¹⁷ Anatumi emba keta randa kapa epena lara ramo doko yulu koo mende pipunusa pyaamo lao suu pyaa napala keyange reke dokona lao nyipusa pilyamo lao suu pyao karare. ¹⁸ Koraisa baa range yulu koo mende pii napalape namwa koo pingi wambu dupwa Anatu dokona lanyaro lao suu pyapala dokona lao kumakaya. Baa pyuo kumakayaminypape banya imambu dokona lete peya. ¹⁹ Baa imambu ingyapala imambu lapo karapusi paleyami dokona lamaiyala peya. ²⁰ Yuu wamba dokopa akali Noa baa sipu mende wasapala banya wambu yanda ipingi nyero nyuo peya. Sipu doko ipwa dokome soo ketae pyambuyamopa nakama lete peyami. Anatumi doloma kando waiya lao pyaa napala isaro kareyamopape wambu lapo simbi simbi pyuo karapala koo keta paleyami dupwana imambu dokonasa letamo. ²¹ Ipwa andake doko bapitisimo yulu dokona ingyuo wambo kongwalu piya. Bapitisimo nyilyamano doko mee yongona karo petenge dupwa wate pyuo lete pelyamasa pii nange. Bapitisimo nyuo dokopa nakama pii mende lalu lao lenge doko moko minyuo kaeya naro lao suu pyapala lete dokona pelyamasa pingi. Yesu Koraisa baa sipurao lete peyamo dokona ingyuo lete paramasa pira. ²² Baa yake panda papala Anatunya kingi rolae dokona piso anjala dupwape imambu mupwa, dee kamongo dupwa iso karamo.

4

Yulu Wambarae Yaki Nyuo Kaepala Anatu Suu

Pyao Karalapape

¹ Koraisa yanengena randa andake neyamo doko nakama keta sela epara lyakande doko doŋo mona kuki palyuo karalapape. Api mendeme yanenge dokona randa nyera ramo doko Satane kata rekya lao epo kararasa pira. ² Wamba yulu koo wangu lakapala pyulu pyuo pyuo kareyami dupwa epapu kapa kaepala Anatunya pii laramuli pyuo pipape. ³ See nange wambu dupwame pundame kumapala, enda kepo pyuo, biya nao kyakapala, pati andake dupwana piso yuu kwuapala nenge renga nao ipwa koo porai dupwa napala Anatu dokona kaeyapala bange kingimi wasisi dupwa kingi lao karaminyi yulu dopale pyuo kareyami. ⁴ Nakama opetae wambo dokopa mee langa dopa pyuo male male lao kareyaminyisa Kurisene ingya nange dupwa akipamo epapu namwa role pyao pii nalyamisi lao see napala kilya kando letaminyi. ⁵ Anatumi wambu kumasi letepe kote lara dokopa nakama apa pyuo kareyama lao renga polo lamairami ingilyamo. ⁶ Dopa pilyamo dokona waili pii keyange doko kumasi wambu dupwa polo lamaiyapya. Nakama isa yuunya karo dokopa yulu koo piyaminyisa Anatumi nakama kando kote leya. Doko nakama waili pii keyange sepala enakana imambu ingyuo Anatu yale kararami dokonasa polo lamaiya.

Anatumi Mora Petengena Renga Keyange Jiyamo Dupwa Isa Pakami Nana

⁷ Yuu lumwa pira doko repe ingilyamo dokona emba range kame pyuo minyuo mona paliramopa karo atenja lalapape. ⁸ Yulu mupwa minyarami

doko wambu yango mona reto karalapape. Mona retarami renge keyange dokome nakamana yulu koo dupwa yambe pyakara ingilyamo. ⁹ Nakama mumu laa nao yango sukusa anda epena lao nenge pyuo pispwape. ¹⁰ Anatumi nakama range wakale wakale keta mora petenge renge jiyamo dupwa mendali keta pisa pisa pyuo maiyalapape. Dokome Anatunya renge keyange dupwa isa pakami nara. ¹¹ Mendeme misi lara ramo doko baa Anatunya pii doko lena. Mendeme mende nyisara ramo doko Anatumi porai renge maiyamo doko nyepala nyiso pyuo karenale. Yesu Koraisa neta renge ingyuo karalu karenge doko keta yulu peparae pirami ramo Anatunya kingi ketae pyambwaramisa pira.

Kurisene Yulu Dokona Randa Nyerami

¹² Nambana puu minyingimoo. Randa wakale wakale nakama keta epelyamo dupwa nakama apiyakale lao mee makande pyuo ipyamosa pilyamo dokona mona nembo yamarangwa nalapape. ¹³ Nakama Koraisana randa nyiyamo dokona mendeke ingyuo nyimwasa pilyamono lao rae maiyuo karalapape. Banya neta renge yulu doko neta epo panaramo dokopa raeme kumuo kararami lyakande. ¹⁴ Nakama Koraisana kimbu moko minyingi dokona reke lao randa nao karamano lao suu pyapala rae maiyuo pupwape. Dopa pyuo pwuamo doko Anatunya Imambu neta renge dokome nakama keta epo paleyasa piya. ¹⁵ Nakama mendeme wambu yango pyao kumakaope waa naope mata kando laope yulu koo dokore pipala randa nyerami doko kapa ingya

nalyamo. ¹⁶ Kurisene ingilyaminyi dokona lao randa narami ramo doko elya napala Koraisana lao nyilyunꞑo lao Anatu ange lamailapape.

¹⁷ Kote andake laramo yuu gii repetale pyaka sepelyamo dokopa Anatu banya wambu dupwa kando wambowana ingyuo kote lara ingilyamo dokona waili pii keyange doko kinyi lao suu pyaa nange wambu dupwa apa pyuo parami?

¹⁸ Dokona ingyuo buku Baepole dokona pii mende palamo.

Doko Anatumi rolae pingi dupwa randa nawali lete wai pyao nyera ramo doko, wambu kamba lenge koo pingipi dupwa Anatu apa pyuo pyuo nyerese?

¹⁹ Randa jerami ramo doko Anatu letamuli pyuo nyilyunꞑo lao suu pyapala yulu keyange dupwa kaeya nao pyuo karalapape. Yuu muu dupwa wasiyamo Anatu doko pii lamana palya nange dokona range pyamalyuo karalapape.

5

Anatunya Sipisipi Dupwa Rapu Pyakamyuo Karalapa

¹ Elyambu Pinginya akali kyawa dupwana pii mende palamo doko epapu langilyu. Namba range Elyambu Pinginya kyawako ingyuo karo. Koraisa baa randa neyamo doko kandeyoko. Dokona namba opetae baa neta renge ingyuo pano eparamo dokopa baapa mendeke ingyuo paro. ² Anatunya sipisipi nakama keta pyamalyisi dupwa mondo lao isakamyuo karalapape leto. Anatumi emba keta sipisipi lapo rapu pyakare

lao pyamalyiya dokona maka sukusuku naa nao pyuo karape. Kanana yulu pilyu lao suu pyaa napala wambu nyisalana doko iki suu pyao pyuo karalapape. ³ Anatunya wambu emba keta pyamalyisi dupwa kando nyuo isa palyili lao kara napala sipisipi peparaena kauwange ingyuo karare. ⁴ Dokome Sipisipinya Rapu Pingi akali angi doko eparamo dokopa kyawa rarange ama keyange yanga paupau lao sulu singi mende emba nyere.

⁵ Nakama wane akali dupwame akali anda-pae dupwana arapunya karapala range mee kuki ingyuo karo lao suu pyapala wakale dupwana kendemande ingyuo karalapape. Baepolena lao dokopa, Anatumi inyimungu karengge dupwa nyuo ketae pyambwapala dee rangeme mupwa lao suu pingi dupwa nyuo isa palyingi letamo. ⁶ Anatunya kingi kape porai dokona isarena range kuki ingyuo karare dokona baa range suu pyaramo mange keyange dokopa emba minyalyuo nyera. ⁷ Baame emba iso karamo dokona embena mona kenda dupwa baa keta pyamalyapala kaeyare.

⁸ Suu pingi karalunja nembapala lenge rao karalapape. Satane baa mena laene rae lenge dopale dokome nakama pyao nalana lee minyilyamo. ⁹ Kurisene yulu dokona pyuku laa napala Satane nyuo meme pinyi nembo karalapape. Randa epelyamo dupwa embako iki nelende daanja. Kurisene yango yuu muu wakale dupwa mendare ingyiyamo. ¹⁰ Nakama yuu gii mendasipa iki yaso nao kararaminyipa Anatu mona keyange palyuo ipingi rengge rengge kuiyuo karengge doko nyisara. Nakama Koraisapa pako

karo banya yanga paupau lenge panda sulu singi dokona ipupwape leyamo doko baame nakama sukunde ingyuo kiso rolapala nakama porainyi pyambwapala paka isa ingyaro kararami. ¹¹ Porai renge dupwa banya ingyuo sulu silyamo, doko kinyi.

Lao Lumwa Pyuo Yako Lenge

Pii Palamo

¹² Nambana yangone mona retenge akali Silipenasa baame pepa pase dake pyakapya. Anatumi mona keyange palyuo namwa nyisingi yulu dupwa pepa dakena pyao palyapunu dupwa yaki nyii nalapape lao pyao jilyu.

¹³ Anatumi wambu yapo nyiyamopa Bapilone dokona Elyambu Pingi yango ingyuo mendare petaminyi dupwa yako letaminyi. Nambana wane Make baame opetae yako lenge pii letamo.

¹⁴ Nakama Kurisene yango sukusa Anatu suu pyao yako lao kingi maiyuo pyuo karalapape.

Nakama Koraisana wambu dupwame mona kyuu lao seramo karamili yaka lao leto.

BUKU BAEMOLE
The Shorter Bible (New Testament and selected
portions of the Old Testament) in the Kyaka Enga
language of Papua New Guinea
Buk Baibel long tokples Kyaka Enga

Copyright © 1973, 1980, 1987 The Bible Society of Papua New Guinea

© Faith Comes by Hearing

Language: Kyaka Enja (Kyaka Enga)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-26

PDF generated using Haiola and XeLaTeX on 21 Feb 2024 from source files dated 31 Aug 2023

8949d805-1f35-50b7-ae5d-683fec0bae65